

**ASO LUA, 18 OKETOPA 2022**

*Na tauaofia le Fonotaga a le Palemene i le itula e 11:30 i le taeao e tusa ai ma le Polokalame o Fonotaga a le Palemene 2022/2023.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

**FAAALIGA MAI LE TAITAI O LE MAOTA**

E tusa ai ma Tulafono Tumau 76 a le Palemene, ua tuuina atu nei le Faaaliga i le Fono Aoao Faitulafono mo le iloiloaina o le Tulafono Tau Faaofi ua faaaliga i inei:

1. Tulafono Tau Faaofi o Teuteuga o le Tulafono o le Pulega o Taulaga 2022.

**TUUIINA ATU** i lenei Aso 17 Oketopa Tausaga 2022.

**Sainia: Hon Fiamē Naomi Mataafa**  
**TAITAI O LE MAOTA.**

**TUSI FAAMAONIA O LE TULAGA FAANATINATI**

**FAAALIGA MAI LE TAITAI O LE MAOTA**

E tusa ai ma Tulafono Tumau 100(2) ma le 102(2), ua tuuina atu nei le Faaaliga i le Fono Aoao Faitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o le Pulega o Taulaga 2022.

**TUUINA ATU** i lenei Aso 17 Oketopa Tausaga 2022.

**Sainia: Hon Fiaame Naomi Mataafa**  
**TAITAI O LE MAOTA.**

**FOFOGA FETALAI:** E ofo alofa ma faatalofa atu i le paia o le Palemene i lenei aso fou i le toe tauaofia ai o le tatou Maota e tusa ai ma le kalena o tatou Aso Fono. Tatou te auai faatasi i le loto faafetai ae i le Atua aua ua pese lava o vai lenei taeao i mea silisili ua Ia faia mo i tatou. E le gata ua mafai ona tatou feiloai i le manuia mo a tatou galuega, ae ua mafai foi ona faataunuuina ma le manuia le Sauniga Aloaia o le Faatautoina o Le Ao o le Malo le Afioga i le Tama a Aiga, le Afioga a Tuimalealiifano Vaaletoa Sualauvi II.

Ua maea ona saunoa le Sui Fofoga Fetalai i le taimi ua sola, ae ua le nofonofu lava i le lagona o le fiafia ma le fia faaleo o se faafetai i le paia o le Palemene ona ua maua ma mamalu le sauniga i le taeao ona o lo tatou auai faatasi. Faamalo faafetai. E tumau lava mamalu o le tatou Maota, o paia foi e le popo i se gagana a le Fofoga Fetalai. I le afio o lau Afioga i le Tamaitai Palemia ma lau Kapeneta filifilia. Le saofaiga a Afioga i Minisita Lagolago.

Afio foi lau Afioga i le Taitai o le Itu Agai ma le mamalu o lea Itu o le tatou Maota, o mamalu faaifogata ia o le alofa o le saofaiga mamalu a le Palemene Lona XVII, a o paia foi e tu maua e toa i ai le puao aua Aiga ma Tama, o Tama foi ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti, ae faapea foi le falalesee ia Tutuila ma Manua, a o le faanonogamanu a auuna o le talalelei. O le faafetai ma le viiga ia foi ma tumau atu i le Atua. O le alofaiva o le tatou Maota i lenei taeao, ia alofagia e le Atua, ia tafatafafa le tofa ma le utaga saili i Lona Agaga Paia. Ia manuia le usugafono a lau Afioga i le Tamaitai Palemia ma le paia o le Kapeneta, ia manuia le usugafono a Minisita Lagolago, agalelei le Atua i le usugafono a le Afioga i le Taitai o le Itu Agai ma lea Itu o le Maota. Ia manuia le tapuai mai a le atunuu, e le gata i Samoa nei, ae faapea foi le mamalu o le atunuu o lo o tapuai mai i itu e fia o le lalolagi.

### **ISI FAASILASILAGA A LE FOFOGA FETALAI**

E tusa ai ma Tulafono Tumau 39(2), ua tufatufaina atu i luga o a outou laulau ia Tusi o Lafo ma Taulumaga a le Fono Aoaofa Faitulafono mo le

Tauaofiaga Muamua o le Paeaiga XVII lenei, e amata mai le aso 14 Setema 2021 seia oo i le aso 29 Aperila 2022.

## **TUUINA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2022/2023 Nu.57, Lipoti o Galuega a le Ofisa Suetusi a Samoa mo le Tausaga Faaletupe 2019/2020;
2. P.P.2022/2023 Nu.59, Ofisa o le Suetusi a Samoa, Suega o Galuega Faatino i le Tapenaga a Samoa mo le Faatinoina o Sini Taiala mo Atinae Faaauau Agagata ma Gafataulimaina;
3. P.P.2022/2023 Nu.60, Tali a le Malo i le P.P.2022/2023 Nu.10, Lipoti a le Komiti o Tupe Maua ma Tupe Totogi i le P.P.2020/2021 Nu.109 ma le P.P.2021/2022 Nu.38, Lipoti Faaletausaga a le Matagaluega o Faalapotopotoga a le Malo mo Tausaga Faaletupe 2019/2020 ma le 2020/2021;
4. P.P.2022/2023 Nu.61, Tali a le Malo i le P.P.2022/2023 Nu.11, Lipoti a le Komiti o Tupe Maua ma Tupe Totogi i le P.P.2020/2021 Nu.106 ma le P.P.2021/2022 Nu.24, Lipoti Faaletausaga a le Faaletupe Tutotonu o Samoa mo Tausaga Faaletupe 2019/2020 ma le 2020/2021;
5. P.P.2022/2023 Nu.62, Tali a le Malo i le P.P.2022/2023 Nu.23, Lipoti a le Komiti o Tupe Maua ma Tupe Totogi i le P.P.2020/2021 Nu.104 ma le P.P.2021/2022 Nu.37, Lipoti Faaletausaga a le Faaletupe o le Atinae o Samoa mo Tausaga Faaletupe 2019/2020 ma le 2020/2021;
6. P.P.2022/2023 Nu.63, Tali a le Malo i le P.P.2022/2023 Nu.3, Lipoti a le Komiti o le Vaega tau le Tamaoiga i le P.P.2020/2021 Nu.64, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2019/2020;
7. P.P.2022/2023 Nu.64, Lipoti a le Ofisa o le Suetusi Sili Aoao i Luga o Tulaga Faaletonu mo le Tausaga Faaletupe 2019/2020;
8. S.R.2022/1, Tulafono Faatonutonu o le Pulega o Faiga Faiva (Gaosiga ma le Auina atu i Fafu o Oloa Tau I'a) 2022.

Ma le faaaloalo lau Afioga.

## **TUUINA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):*

1. P.P.2022/2023 Nu.47, Lipoti a le Komiti o Tulaga Aloaia ma Amio Taualoa i luga o le Faitioga Tusitusia Aloaia a le Sui Palemia e faasaga i Sui Usufono o Itumalo Palota o Lepa & Faleata Numera 3, Toe Asia o le Faasalaga;
2. P.P.2022/2023 Nu.44, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2020/2021 Nu.76, Faamatalaga o Sini Autu a le Ofisa Tausi Mavaega a le Malo 2021-2024;
3. P.P.2022/2023 Nu.45, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2020/2021 Nu.105 ma le P.P.2021/2022 Nu.40, Lipoti a le Komesina o Sulufaiga i le Tulaga o Aia Tatau a Tagata Soifua 2020 ma le 2021;
4. P.P.2022/2023 Nu.46, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2020/2021 Nu.136 ma le P.P.2021/2022 Nu.39, Lipoti Faaletausaga a le Ofisa o le Komesina o Sulufaiga mo Tausaga Faaletupe 2019/2020 ma le 2020/2021;
5. P.P.2022/2023 Nu.49, Lipoti a le Komiti o Tupe Maua ma Tupe Totogi i le P.P.2020/2021 Nu.99 ma le P.P.2021/2022 Nu.27, Lipoti Faaletausaga a le Faalapotopotoga o Mea Tau Fale a Samoa mo Tausaga Faaletupe 2019/2020 ma le 2020/2021;
6. P.P.2022/2023 Nu.51, Lipoti a le Komiti o le Vaega Tau le Tamaoaiga i le P.P.2020/2021 Nu.111, Lipoti Faaletausaga a le Matagaluega o Mataupu tau le Va i Fafu ma Fefaatauaiga 2019/2020;
7. P.P.2022/2023 Nu.52, Lipoti a le Komiti o le Vaega o Atinae Eseese i le P.P.2020/2021 Nu.67 ma le P.P.2021/2022 Nu.44, Lipoti Faaletausaga a le Matagaluega o Galuega, Felauaiga ma Atinae Eseese mo Tausaga Faaletupe 2019/2020 ma le 2020/2021.
8. P.P.2022/2023 Nu.53, Lipoti a le Komiti o le Vaega o Atinae Eseese i le P.P.2020/2021 Nu.73, Lipoti Faaletausaga a le Pulega o Malae Vaalele 2019/2020;
9. P.P.2022/2023 Nu.54, Lipoti a le Komiti o le Vaega o Atina'e Eseese i le P.P.2020/2021 Nu.101, Lipoti Faaletausaga a le Pulega o le Suavai 2019/2020;
10. P.P.2022/2023 Nu.55, Lipoti a le Komiti o le Vaega o Atina'e Eseese i le P.P.2020/2021 Nu.131, Fuafuaga Autasi a le Pulega o le Suavai 2021/2024 ma le P.P.2020/2021 Nu.132, Faamatalaga o Sini Autu a le Pulega o le Suavai 2021-2024;

11. P.P.2022/2023 Nu.56, Lipoti a le Komiti o l Vaega o Atina'e Eseese i le SR 2021/7, Tulafono Laitiiti o Fale a Samoa 2017, Faasilasilaga o le Amata Faamamaluina;
12. P.P.2022/2023 Nu.58, Lipoti a le Komiti o le Vaega o Atina'e Eseese i le P.P.2020/2021 Nu.102, Lipoti Faaletausaga a le Pulega o Felauaiga i le Laueleele 2019/2020;
13. P.P.2022/2023 Nu.65, Lipoti a le Komiti o le Vaega tau le Va Fealoai i le P.P.2020/2021 Nu.72 ma le P.P.2021/2022 Nu.59, Lipoti Faaletausaga a le Pulega o Tinei Mu ma Faalavelave Faafuasei a Samoa mo Tausaga Faaletupe 2019/2020 & 2020/2021;
14. P.P.2022/2023 Nu.66, Lipoti a le Komiti o le Vaega tau le Va Fealoai i le P.P.2020/2021 Nu.13, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2020/2021;
15. P.P.2022/2023 Nu.67, Lipoti a le Komiti o le Vaega tau le Va Fealoai i le P.P.2020/2021 Nu.119, Lipoti Faaletausaga a le Matagaluega o Leoleo, Falepuipui ma le Toefuataiga mo le Tausaga Faaletupe 2019/2020;
16. P.P.2022/2023 Nu.68, Lipoti a le Komiti o le Vaega tau le Va Fealoai i le P.P.2020/2021, Nu.57 ma le P.P.2021/2022 Nu.29, Lipoti Faaletausaga a le Matagaluega o le Soifua Maloloina mo Tausaga Faaletupe 2019/2020 & 2020/2021;
17. P.P.2022/2023 Nu.69, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P.2020/2021 Nu.139, Lipoti a le Ofisa o le Komesina o Faiga Palota mo le Faiga Palota Laitiiti, Itumalo Palota o Gagaiformauga 3, 2020.

Ma le faaaloalo lau Afioga.

### **ILOILOGA O LIPOTI A KOMITI FAA-PALEMENE**

#### **P.P.2022/2023 NU.47, LIPOTI A LE KOMITI O TULAGA ALOAIA MA AMIO TAUALOA I LUGA O LE FAITIOGA TUSITUSIA ALOAIA A LE SUI PALEMIA E FAASAGA I SUI USUFONO O ITUMALO PALOTA O LEPA MA FALEATA NUMERA 3, TOE ASIA LE FAASALAGA - ILOILOGA**

**FOFOGA FETALAI:** E i ai le manatu o le Fofoga Fetalai ua manino le tatou Maota i Tualumaga o lenei Galuega, aemaise o le tulaga na oo i ai lenei mataupu ina ua uma ona faamaonia e le tatou Maota i le aso 24 o Me 2022.

O le agaga maualuga ina ia mafai lava ona taoto i le agatonu lenei mataupu e tusa ai o faiga masani ma taualumaga faa-Palemene e tausia ai le tulaga mamalu ma le aloaia o le tatou Palemene.

O le toe tuuina atu o lenei Galuega i le Komiti, e le toe tau faamaninoina. E i ai le taofi, o le a matua manino se folasaga a le Afioga i le Taitaifono ma le tatou Komiti i itu ia.

E tusa ai o Tulafono Tumau 182, e tataua ona tuuina atu le faamuamua i so o se Lipoti a le Komiti o Tulaga Aloaia ma Amio Taualoa i se mataupu e fesiligia ai tulaga aloaia, nai lo se isi lava galuega a le Fono Aoao.

Ma o le a sagai atu loa le Fono Aoao mo le iloiloina o le Lipoti a le Komiti o Tulaga Aloaia ma Amio Taualoa e pei ona faataatia i le Laulau-a-Fono i le taeao nei.

Ou te tapa ma le faaaloalo lau Afioga i le Taitaifono o le Komiti o Tulaga Aloaia ma Amio Taualoa lau Afioga Hon Valasi Luapitofanua Toogamaga Tafito Selesele.

**Afioga Hon VALASI LUAPITOFANUA TOOGAMAGA TAFITO SELESELE (Taitaifono o le Komiti o Tulaga Aloaia ma Amio Taualoa):**

Lau Afioga i le Fofoga Fetalai, ou te tulai ma le faaaloalo e faatu le lafo, *Ina ia faamaonia e le Fono Aoao le Lipoti a le Komiti o Tulaga Aloaia ma Amio Taualoa i le Fautuaga Tusitusia a le Afioga i le Sui Palemia e faasaga i sui usufono mo Lepa ma Faleata Nu.3. I lea faitioga, o lo o tuuina atu ai ana Sailiiliga ma Fautuaga.*

O le lafo lea.

*Faaluaina e le Minisita o Faatoaga ma Faigafaiva, Minisita mo Pisinisi, Alamanuia ma Leipa ma le Minisita mo Leoleo ma Falepuipui.*

**FOFOGA FETALAI:** Tulai mai lau Afioga i le Taitaifono o le Komiti o Tulaga Aloaia ma Amio Taualoa mo le tolaulauina o Sailiiliga, Fautuaga ma Iugafono a la outou Komiti...

**Susuga Hon Tuilaepa Fatialofa Auelua Sailele Malielegaoi (Taitai o le Itu Agai):** Faamolemole lava lau Afioga pe mafai ona fai se faamatalaga, afai lava e le mafai, o le a ou toe nofo i lalo.

**FOFOGA FETALAI:** Malie lau Afioga, e i ai se taimi ma le avanoa e tuuina atu aloaia i lau Afioga.

Tulai mai lau Afioga i le Taitaifono.

**Afioga Hon VALASI LUAPITOFANUA TOOGAMAGA TAFITO SELESELE:** Lau Afioga i le Fofoga Fetalai ou te folasia i luma o le

Palemene le Lipoti a le Komiti o Tulaga Aloaia ma Amio Taualoa mo le silafia e lenei Maota ma le faafofoga tapuai mai a Samoa.

Ee ia i toaga mafana ma taoto faagalua e le fati ae ufiufi faafaleseu o tupu paia, o sa ma faiga o Samoa, aua o paia ma mamalu ua uma ona tatanu ona magalafu, o paia foi ma mamalu ua maea fusifusi ona fausa, o paia foi ma mamalu ua aisa ona i'a se i tulou.

O Samoa o le atunuu ua uma ona tofi, ua taoto alao ona upu popo, o le sami e le soona fagotalia e se tautai ae leai foi se isi e toe tapuvaelaaina pe utuvaitofo i ai, aua o Samoa lava ia, e mamala ae mamana foi ana upu se i tulou. E leai lava se vave leai se potu na te pulunofoina le oloagiga, e leai lava se atamai na te foua le apulutamuliauma e faigata, o Samoa o le i'a ivi lililo e auaugata, e faigata foi ona faiga.

Lau Afioga i le Fofoga Fetalai ma le mamalu o le Maota, ae ou te le i folasia le Lipoti a le Komiti, e ao lava ona ou pai atu i le tapuaiga a le atunuu mamana, i le afio o le Afioga i Le Ao Mamalu o le Malo le Afioga i le Tuiaana, ae tainane le Masiofo. Le Afioga i le Sui o le Fono a Sui Tofia ma le Faletua, ae le gata foi i lea o le Afioga i le Palemia ma le Kapeneta, Faamasino Sili ma le Ofisa o Faamasinoga, lau Afioga i le Fofoga Fetalai ma lenei Maota mamalu, ae a Samoa ua potopoto ma faafofoga mai.

Le paia maualuga aua Tama Aiga, Aiga ma Tama, Ituau ma Alataua, Aiga i le Tai ma le Vaa o Fonoti. Ae a le faafofoga a lo tatou motu i Sasae po o tatou uso, le Afio o le Kovana Sili, le Lutena Kovana, i ona tulaga faalupe faale-Malo, ae a le afio o le Fofoga Fetalai ma Maota e Lua, le mamalu ia Tutuila ma Manua. A ou faapea atu o le afio lava lea o Sua ma le Vaifanua, Fofu ma Aitulagi, Ituau ma Alataua, Saole ma Saleaamua, le Launiu na Saelua. Faatui ole Motu ae tainane le Manuatele, le Launiu na Saelua.

Ou te talitonu o paia ia o Samoa. Ae e i ai le manatu lau Afioga i le Fofoga Fetalai, e le faagaloina le tapuaiga a le Au Sa Levi ma le Au Sa Iuta, le aufaitatalo o lo o tatalo i le po ma le ao, ae tainane le tapuai leleoa i faiva o lenei Maota ma le Palemene o Samoa.

E le gata foi i lea, o le paia maualuga i le au tautua, aemaise alii ma faipule, o fea lava le mea o lo o apaapa mai ai le tautua, o atunuu e mamao ma so o se mea lava, o lo o faafofoga aua upufai o Malo.

Lau Afioga i le Fofoga Fetalai, ona ou manatu lea, e puupuu lava sau folasaga, aua o lea ua uma ona i luma maota i uluai taimi tulaga pei ona i ai sailiiliga a le Komiti i le uluai sailiiliga. Peitai o le toe oo mai o lenei mataupu i le Maota nei aemaise o le toe afea ai o le Komiti, ua taumafai lava i se mafai ina ia mafai ona fesoasoani mai i le Palemene o Samoa aua lenei mataupu e pei ona i ai ma silafia uma.

Ona matou faapea lea, lau Afioga i le Fofoga Fetalai, faafetai tele mo le avanoa ua tuuina mai e fai ai au ma sui o le matou Komiti, e pei ona tofia e le Palemene e fofola atu le taunuuga o a matou sailiiliga. Ou te muai

faafeiloai atu i lau Afioga i le Fofoga Fetalai, aemaise le Tamaitai Palemia ma le Kapeneta, aemaise lenei Maota mamalu i ona sui usufono uma.

E faafeiloai atu foi i lau Afioga i le Failautusi o le Fono aemaise le Ofisa o le Fono, le mamalu o Ofisa Sili o Pulega o Matagaluega eseese ua aofia i lenei Fonotaga aua lava le tautuaina o le tatou Malo.

Lau Afioga i le Fofoga Fetalai a o le i sii le vaa e fufui i tai, ae talitonu o le a taumafai atu sina faamatalaga a lenei Komiti. E muamua lava ona ou faamaalo iuofe i lenei galuega ina ia manino ai le Maota, o le galuega lenei e pei ona lausilafia e lenei Maota, ua maea ona faia i ai le faaiuga a le Fono Aoaofaaitulafono mamalu, e tusa ai o le Tusi Faasea na tuuina mai e le Afioga i le Sui Palemia, e faasaga i sui usufono e aafia i lenei mataupu, lea na tuuina atu e sui usufono mamalu i le Faamasinoga i le faaiuga a le Palemene, ma tuuina mai ai loa le Faaiuga a le Faamasinoga i le maea ai o ana iloiloga e faapea; ia toe asia le faasalaga. O le ala lea ua toe faatulai mai ai lenei Komiti, ina ia se i toe asia le faaiuga na faia i tulaga tau faasalaga.

Lau Afioga i le Nofoa, e malu i lau Afioga i le Fofoga Fetalai, e le o i ai lava ni vaega fou sa iloiloina e le Komiti, e le i agai foi le Komiti e toe asa se isi alafua fou, pe toe aloina foi atuvasa sa afua ai lenei mataupu. E leai, sa agai sao lava le Komiti e faatino galuega e pei ona tuuina mai e le faaiuga a le Faamasinoga. Ona i ai lea o le manatu, o le a ou le auililiina lenei Lipoti i ona vaega uma e pei ona i ai, ae o le a tau lava ina ou faailo matapuna i le tulaga aoatotele o sailiga a le Komiti, ma se faaiuga a o se fautuaga foi ua taunuu i ai lenei mataupu e pei ona faatinoina e le Komiti i totonu o aso e 8 sa faataoto mo ana fonotaga.

Lau Afioga i le Fofoga Fetalai, o le aso 30 o Aokuso 2022, sa tuuina mai ai le iuga a le Faamasinoga, ua faaleaogaina le faamalolo le tumau o le sui usufono o Lepa ma Faleata Nu.3, ona e le i tuuina se avanoa e faaleo ai so la finagalo i le faasalaga. Na taunuu i ai le Fono Aoaofa ma ua aafia ai le la aiatatau, e pei ona aiaia i le fuaiupu 9(1) o le Tulafono Faavae o le Malo Tutoatasi o Samoa, ma e mafai ona toe asia e le Fono Aoaofa se faasalaga talafeagai mo nei sui usufono ma ia mulimulitai i aiaiga o lo o faataoto mai i le Tulafono Faavae.

Le mamalu e o lenei Maota, ona o lenei faaiuga, na faatonuina ai e le Fofoga Fetalai i lana tusi i le aso 8 Setema 2022 le Komiti lenei, ina ia toe tauaofia i le aso 12 o Setema 2022 e toe iloilo ai le faaiuga ua tuuina mai.

Na i ai ni atualuga o nisi o sui o le Komiti, lau Afioga i le Fofoga Fetalai, e uiga i le afuaga o lenei galuega, lea ua toe tau aofia ai nei le Komiti, o se tulaga sa fefaasoai ai le afioga i le Fofoga Fetalai, mo le faamaninoina o vaega ia sa moomia e le Komiti se maninoga. Ona o ia tulaga ua matauina ai e le Komiti ma ua faamauiina e le Ofisa, e i ai lava vaega o le Tulafono Tumau ma le Tulafono o Pule ma Tulaga Aloaia e fesootai ma lenei mataupu e ao ona toe silasila i ai mo ni teuteuga talafeagai mo le lumanai. E pei foi ona fautuaina e le Ofisa o le Loia Sili, i le feiloaiga ma le Komiti.



Lau Afioga i le Fofoga Fetalai, sa maua le avanoa o sui usufono o lo o aafia i lenei mataupu e feiloai ai ma le Komiti, ma faaalua mai ai foi o laua taofi e uiga i le faasalaga sa fautuaina e le Komiti le Fono Aoa, ma ua toe aumai ai le faaiuga a le Faamasinoga, ina ia toe asia.

Ona ou oo mai lea i le faaiuga a le Komiti lau Afioga i le Fofoga Fetalai, i sailiiliga a le Komiti i le aoatetele, o lenei mataupu ua taunuu ai le Komiti i sa latou fautuaga e tuuina atu i le Fono Aoa.

E talu ai ua faamaonia e le Faamasinoga le solia e sui usufono o tulaga aloaia o le Palemene, ma faamaonia ni amio faalemigao e agai i le Palemene, o nei solitulafono o ni solitulafono matuia. Ma e i ai le talitonuga o le Komiti, e tatau ona i ai se fua faatatau ina ia taofia ai ni faiga faapenei pe a toe tutupu mai i le lumanai.

O le faaiuga sa tuuina atu i le Fono Aoa seia i ai se aso. Ae peitai, ua faaiugafonoina e le Komiti, ina ia faamanino se taimi po o se piriota o lea faasalaga.

Lau Afioga i le Fofoga Fetalai, o le silasila a le Komiti o se itu lelei lea. Ona o le a i ai se fua faatatau e faigofie ai ona fai faaiuga fai a le Palemene i le lumanai aemaise o le mafai ona faaogaina o se faaiuga ma se fautuaga a le Komiti e avea ma faaitaiga lelei. E mafai ona mulimulitai i ai le Fono Aoa i ana faaiuga fai.

Lau Afioga i le Fofoga Fetalai, ona o le matuia o solitulafono a sui usufono mo Lepa ma Faleata Nu.3, sa amata ai le iloiloga a le Komiti mo se faasalaga talafeagai mo i laua. E pei ona amata mai i le 36 masina e nofo sala ai. Aepeitai, sa silasila le Komiti i itu lelei ma nisi mea e aofia ai. 1. O le tolu masina sa faamalolo le tumau ai, faatoesega sa saunoa i ai le sui usufono mo Faleata Nu.3 i totonu o le Palemene. Sa faamalulu foi le sui usufono mo Faleata Nu 3 i luma o le Komiti, i le amanaia ai, o le laua soifua tautua i Upufai o Malo. Lau Afioga i le Fofoga Fetalai, o ni tagata aoga se i tulou, e tele mea lelei ua fai, peitai ua manatu le Komiti, ua tatau ona i ai se faaitiitiga o le faasalaga e ala i se fua e tuuina mai.

Lau Afioga i le Fofoga Fetalai, ona taunuu ai lea o le Komiti i lana faaiuga e faapea.

Ua fautuaina e le Komiti i Tulaga Aloaia ma Amio Taualoa le Fono Aoa;

1. *Ina ia tuueseina sui usufono mo Lepa ma le sui usufono mo Faleata Nu.3 mai galuega a le Fono Aoa mo le umi e 24 masina.*
2. *E le agavaa nei sui usufono ua tausalaina, ona maua ni faamanuiaga i totogi ma alauni faa-Palemene e tusa ai ma Tulafono Tumau 187 (5).*
3. *Ua fautuaina e le Komiti le Fono Aoa, ina ia i ai se avanoa mo sui usufono ua tausalaina, mo so la finagalo i le faasalaga e pei ona aiaia i lalo o le Faavae.*
4. O sui usufono ua tuueseina mai galuega a le Fono Aoa, o le a le mafai ona toe faatinoina tulaga nei e pei ona aiaia i le Tulafono Tumau 92(12):

- i. E le mafai ona toe ulufale i le Maota, po o malae po o lotoa o le Palemene.*
- ii. E le toe mafai ona i ai i ni Komiti faa-Palemene; ma*
- iii. Po o le faia o se fesili po o se faasilasilaga po o se lafo i totonu o le Palemene.*

Lau Afioga i le Fofoga Fetalai, o le taunuuga lena o sailiiliga a le Komiti. Ae e i ai lava se vaiiliu e ao ona faamanino i le tulaga o sui usufono e le o saini i le lipoti, e le o se mea fou lau Afioga i le Fofoga Fetalai, o le aiatatau faasui usufono lava lea i totonu o so o se komiti a le Palemene e tusa ai o le Tulafono Tumau. Aepeitai, o le faaiuga aloaia o le itu lea ua fulisia i ai finagalo o sui usufono o le Komiti.

Lau Afioga i le Fofoga Fetalai, o le aotelega lena o le lipoti a le Komiti, ae o le atoaga ma le auiliiliga o mataupu taitasi o lo o i totonu o le lipoti. O a ni fesili o le a fesiligia ai le mamalu o le Palemene la matou lipoti, o le a taumafai lava le Taitaifono ma le Komiti mamalu, e talitali atu.

O se avanoa lelei lenei ou te faafetaia ai sui mamalu uma sa auai i lenei Komiti, malo le faauta mamao ma le tofa faatamalii. Ua faafetai i le tapuaiga a le Palemene, aemaise le atunuu atoa i o matou faiva a o feagai ai i le iloiloaina o lenei mataupu.

Ia tau ia ina ia faamanuia le Atua, i le faafogafoga tapuai mai a Samoa le atunuu pele Samoa e, aemaise le tele o tafa o le lalolagi, o lo o nopiai ai lo tatou atunuu ma faafogafoga mai.

Ia alofagia e le Atua lau Afioga i le Fofoga Fetalai, le Afioga i le Tamaitai Palemia ma le Kapeneta, aemaise le mamalu o le Palemene.

O se folasaga lea i le ava ma le faaaloalo, e tuuina atu i luma o le Palemene aua sana fautuaga aemaise o tulaga uma e pei ona tolaulauina.

Ia manuia le Fono.

**FOFOGA FETALAI:** Tulai mai lau Afioga i le Palemia.

**Afioga Hon FIAME NAOMI MATAAFA:** Lau Afioga i le Fofoga Fetalai, tau o se mea o lo o fia maua ai se malamalamaaga, o lea e maua mai, e le o alu se faasalalauga o le tatou Fono, pe o i ai se mea o tupu?

**FOFOGA FETALAI:** O lea ua maua. E faamalulu atu foi i le paia o le Maota, ona o lea faatoa maua e le Nofoa le tulaga lea, ona o lea sa lelei i le taeao a o lea ua faaletonu i le taimi lenei. E mafai ona faaaau le tatou fono ae o lo o record. Ae i le tulaga lava ia aloaia, e le o ogatasi ma le tulaga e tataua ona i ai. O le mea lea, ua ou manatu, o le a faataatiaese galuega a le Fono, se i mautinoa o faasalalau le tatou Fono, ia ona faatoa toe faatino lea o le tatou Fono ma tatou feiloai.

O le mea lea e faasilasila atu, o le a faataatiaese Galuega a le Fono.

*Na faataatiaese Taulumaga a le Fono Aoao i le itula e 12:10 i le aoauli ona o le faaletonu o fesootaiga tau upega tafailagi mo le faasalalauina o felafolafoaiga a le Maota.*

*Na toe faaauau Taulumaga a le Fono Aoao i le itula e 12:32 i le aoauli.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoao Faitulafono. E avatu malu i puega i le paia o le Maota, aemaise foi o le faafofoga mai o le atunuu, e tusa ai foi ma le motusia o le tatou galuega, ona o nisi o faaletonu i tatou fesootaiga. A o lea ua logo mai le Nofoa o lo o sologa lelei lava, le leitio le 2AP aemaise o le alaleo a le Malo, vagana le Facebook lea e maua o lo o faaletonu ma o lo o galulue ai le Matagaluega o Fesootaiga ina ia taumafai e faalelei atili ia tulaga. Ae ua i ai le manatu o le a faaauau pea la tatou galuega.

O lea ua faailoa mai o lea ua toe lelei, faafetai. E momoli le agaga faafetai i lau Afioga i le Taitaifono mo le tolaulauina manino o la outou lipoti. O lea ua faafofoga le Maota, e i ai foi le talitonuga ua manino mea uma e pei ona folasia, malo faafetai.

A o le i faagasolo le tatou galuega, ou te faamanatu atu i sui usufono e fia saunoa i le lipoti lenei, ia o tatou usitaia aiaiga o tatou Tulafono Tumau 182, e leai se sui usufono e mafai ona saunoa e sili atu nai lo le 10 minute i so o se felafolafoaiga e faia i se lipoti mai le Komiti o Tulaga Aloia ma Amio Tauloa.

A o le i tuuina atu le avanoa i sui usufono mamalu e fia saunoa, o le a tuu atu muamua le avanoa i sui usufono mamalu o lo o aafia i lenei mataupu, mo so la finagalo, ona faatoa maua mulimuli ai lea o avanoa mo le tatou Maota e saunoa ai. Ae ao foi ona ou faamanatu atu, a o le i saunoa ia sui usufono mamalu o aafia, e pei ona saunoa le Taitaifono, ua maea le faaiuga a le Palemene e pei ona i ai. E pau lava le tulaga o lea ua toe asia ai e le Komiti, ua na o le faasalaga, e pau foi lea o le itu e ono oo i ai a tatou saunoaga, o le faasalaga. O lea ua tuuina mai e le Komiti e 24 masina. O le avanoa lea tatou te agai sao ai lava i le faasalaga po o talafeagai, po o nisi tofa ma faautaga i le paia o le Maota, po o fea lava e i ai la outou faatofalaiga.

O le fautuaga lena a le Nofoa, ina ia tatou agai sao lava i le faasalaga 24 masina lea ua tuuina mai e le Komiti.

O le avanoa lenei mo le Afioga i le sui usufono mo le itumalo palota o Lepa, lau Afioga i le Taitai o le Itu Agai

**Susuga Hon TUILAEPA FATIALOFA AUELUA SAILELE MALIELEGAOI:** Lau Afioga i le Fofoga Fetalai, faapea foi lau Afioga i le Palemia ma le Kapeneta, faapea sui mamalu o le tatou Palemene.

O lea ua i luma o le Atua Soifua e faavae ai le tatou Malo, o le taulaga na e osia lau Afioga i le Fofoga Fetalai, e faapea ona e taitaiina ai lo tatou Maota i lenei taeao i le tatalo. Ua tatou faalogologo foi i le saunoaga a le Afioga ia Patele, i le faauuina o le Afioga i Le Ao Mamalu, ua atili lava taoso ai i tatou i lenei taeao. Ma tatou te auai faatasi i le viiga ma le faafetai i le Atua, e a le faamagaloga o tatou i mau sese, e ao ai ona tatou tulivae pea lava pea i luma o le Atua faafofoga tatalo i aso uma, o le tatou ola, aua o le tatou lea natura, o le sese. Aua lava, aua lava ne i ia i tatou, a ia i le Atua pea le viiga e tatau ai.

Lau Afioga i le Fofoga Fetalai faapea foi le mamalu o le tatou Maota nei, o se laolao lelei foi lenei e momoli ai le faafetai i le tapuaiga le leoa a le tatou Ao mamalu o le Malo, le Afioga i le Tuiaana, faamalo i lou valaauina mo le isi Paeaiga fou e ala i le musumusuga lilo i le afioga i le Taitai o le Malo faapea le Kapeneta, e faapei ona saunoa manino ai le Afioga i le faifeau na taitaia i tatou i lenei taeao. Ua faamalo le tauatai, faamalo le galue, ia sagai ane ai o le tai, ina ia maua manatu, le malosi o le tino aua le tautuaina o lo tatou Malo.

Afio foi le Sui Tofia faapea le Faamasino Sili, le paia o Samoa i ona tulaga faalupea, aua Aiga ma latou Tama, Tulatoa o aiga ma faleupolu tofia, tainane le Usoga a Tumua ma Puleono i Salafai.

O paia ma mamalu faalupelupe o tatou uso tuofe ma le latou foi Faigamalo i le la itu o le vai, Tutuila ma Manua, tulouna ia. Afio le Afioga i le Kovana ma lana Kapeneta ma le Faamasino Sili, tainane le Peresetene ma Afioga i Senatoa o le Maota maualuga, ae a le Fofoga Fetalai ma sui mamalu o le Maota o sui, o paia lava ia e faasino i le falelima i Sasae, ma le falelima i Sisifo. Le nofo a Maopu ma Faatui ma Tootoo ma upu i le Manuatele. I le tupu pea tupu pea o le agaga loto atunuu, o Malo o lo o faafoefoe i faiga faakolone, o lo o tatou faalogoina pea taulumaga o le malo aufaatasi. E tatou te le mailoa aluga o aso, e le tauiso le taua o le sao o le faigamalo a Tutuila ma Manua i le saofaiga a Malo o le Pasefika i le lumanai. E ono tulai mai ai Samoa e lua, e atili tumatila ai i le malaetae a tatou faigamalo e galulue soosoo tauau. E lua ai o tatou leo e faatonufofua i tonu fai o le Pasefika i Upufai o Malo, faava-o-Malo o le lalolagi. O le agaga saili malo lena na faataoto mai e o tatou matua ua fai i lagi le latou folauga, ae lafo mai ia i tatou, e solisoli muliaao i taiala ma taulamua ai tatou te faaauuina. E faaauau i le loto tele, ma le agaga loto mau ma le filiga.

E faafetai foi i le faanonogamanu faifai pea a le aufaigaluega paia a le Atua, o lo o latou tauasu le ipuvai o le soifua aua lo tatou soifua faale-agaga. O outou sa ma faigata, nuunuu atu faatini o tausala.

Lau Afioga i le Fofoga Fetalai, ou te taofi o le isi lenei taeao fou, e taua i tala faasolopito o le Palemene lenei o Samoa. Ua malama i ulugalulu le faatofalaiga a alii ma tamaitai o le faamasinoga, ma le latou tiute fai o le

faauigaina o tulafono e pasia atu, e le Fono Aoa o lenei Faitulafono o le tatou Malo Tutoatasi o Samoa.

Ou te manatu foi e le toe agai i ai se upu, faafetai i lau Afioga i le Fofoga Fetalai, i lau faaiuga ua mafua ai ona tatou laulua fesilafai i lenei taeao fou. O le Fono Aoa o lenei Faitulafono, tatou te tau fai puipui i ai i lona mamalu ia atoatoa. Ma o se itu e le tusa ai, le fuli e le faamasinoga o ni faaiuga mamalu a le Maota lenei. A o fea ea e sulufai i ai le faipule mo se laveai, o le tulaga le maalofia lenei, pe a laaloa le silasila i aiatatau, o tatou o lo o faataua mai e le Faavae. O le tofa na agai i ai le Palemene, e faasala ai ni faipule ua tau matuaina i totonu o le Maota lenei. A lea ua tau le ta, ua faalumaina, i le faatea faalemamalu i se piliota e leai foi se tapulaa mautinoa. Ua matua faamativaina foi i le mea e oo i ai le malosi o le Malo, ma sui i totonu o lenei Palemene, i le umi e pei ona faaleo e le Taitaifono o le komisi i le uluai aso na tagofia ai le mataupu lenei i totonu o le Palemene, se i vaai pe sui le amio. O se lafoga e tau mamaina ai le mamalu o faipule o le Maota lenei. E na o le olo lava o le fua ma inu le ipuvai o le onosai ma le loto faamagalalo. Sa le i mafai ona tali atu i ia faasalaga tetele e lua, e manatu e silia laititi ma le lima masina, ma e le oti faalua foi se isi. O le a le oo lava se upu i aiatatau faasui mamalu o le tatou Maota lenei, e faaleo saoloto ai o latou lagona e aunoa ma le faalavelaveina. O le saolotoga lenei faale-tulafono faavae o le Malo Tutoatasi, o lo o tatou laulauvivilu ai pea. E malamalama ma manino i ai, lau Afioga i le Fofoga Fetalai.

E faaiu atu ai se lagona ma se upu i lenei taeao, a fai ua le lava le lua o sala mamafa ua maea ona faatino e faia o ni ai, o le finagalo faamaliegata o lenei Itu o le Maota.

O le taofi, lau Afioga i le Fofoga Fetalai, aua le poia Faleolo, talofa e, se ua gasea lau afioga i le Fofoga Fetalai, e oso pea le la, e sau foi ao o nuu. O lea foi ua o taulimaina i le po anapo, le faaiuga a le Komiti e faamalolo i maua nei mo le luasefulufa masina. E muliai oo mai i totonu o le Maota, ae na muamua oo mai ia i maua. O le a se tali? O se feau faatupu manatu e taua tele ia te au. Ou te manatu foi e tatau ona ou oo i ai. O se lauga taua lava a se tasi o faifeau, sa na ia faafoe le faigalotu a le Matagaluega o le Faamasinoga i tausaga ua tea. O lea e masani ona fai, e avatu ai se tuualalo i Alii o le Faamasinoga. Fai mai a ia, outou o alii ma tamaitai faamasino, o le taimi e tou te saofafai ai loa, i tou nofoalii o le Faamasinoga, o le a fai la outou iuga. Ia manatua, aua, aua lava ne i faavae a outou faaiuga i le alofa, e sese ai faaiuga. A ia faavae i le faamasinoga tonu.

Ma e malamalama lelei lava, le faamasino i le iuga e tonu ma sa'o. O le agaga foi lenei, o le faaoololomaau ina ia o tatou mulumuluafue faatasi i le agaga o le avatu, aumai. O upu masani o Fonotaga a le Palemene o le Taupulega, e le milia faauu upu o le Maota lenei. Ae e tumau, tumau lava aga faatamalii ua o tatou masani ai i a tatou tu ma agaifanua, o le feoeoeai, ma le feavatai o Taitai o le atunuu i totonu o le Palemene lenei.

Ia faaifo mai lagi manu mo Samoa nei ma ielua. Soifua ma ia manuia lo tatou Maota.

**FOFOGA FETALAI:** Ua faamalo faafetai le saunoa i lau Afioga i le sui usufono mamalu mai Lepa po o le afioga foi i le Taitai o le Itu Agai. O lea foi ua faafogafoga ma le totoa le paia o le Maota i lau saunoaga e tusa foi o le tatou mataupu ua i lumamea nei o le Laulau a Fono. Malo tofa, faafetai foi saili i le filemu o le tatou Maota aemaise o le faafogafoga mai o le tatou atunuu. Faafetai mo lau saunoaga.

Ia, o le avanoa lenei mo le afioga i le sui usufono o Faleata Nu.3. Tulai mai lau afioga i le sui usufono mamalu.

**Tofa LEALAILEPULE RIMONI AIAFI (Faleata 3):** E momoli atu le faafetai tele i lau afioga i le Fofoga o le Fono mo le avanoa. Masalo ua maea ona paelago paia ma sa o Samoa i tuleiga ma saunoaga o lenei taeao. Ae a le tatou va tapuia ma le Alii le faavae papa o Samoa.

E le toe tau faamapueina le Maota o Samoa, le Maota ua maea ona tofi e o tatou tuua. E le toe tau apaapa foi i tapuaiga a Samoa ma Pule, Samoa ma Aiga aua o le tapuaiga mamala. A o ia foi paia ma mamalu, ua toele i le Atua soifua. O le faavae papa ma le maluapapa e faavae ai ia lo tatou Malo. O le Malo na tofi ma mamanu i Tiafau nei, o le toaiga o Aiga ma le Usoga lea e faafesagai ai ia itutino le Palemene o Samoa ma le Faamasinoga.

Ae ou te muai ave foi le faamalo, se faafetai ma se faamanuia i le Afioga i le Ao mamalu o le Malo, Afioga i le Tuiaana Tuimalealiifano Sualauvi II. Manuia tele lou tulai mai aua Samoa.

Ae o le aso lau Afioga i le Fofoga o le Fono, ua taoto fuataga a le Komiti. O le faatauvaa o Faleata 3, e na o le Atua e na te silafia mea uma, aua e oo lava i mea lililo o tatou loto, e le mafai ona o tatou lalafi ai. Aisea? O lenei i ina i lenei Itu o le Maota le numera. E talia ma faamaonia ai fautuaga a le Komiti. Pe e alu ai lenei aso o tatalo atu, e i ai le manatu ma le matau, ia e le suia lava pe a matau i iu o matagi.

Lau afioga i le Taitaifono, faamalo faafetai ina ua maea ia le tatou feiloaiga muamua sa ou foi ma lou talitonuga ua i ai se suiga i le Komiti. E pei ona e saunoa o lau tala, alo ane i luma aua le Malo o Samoa, ua tau le ta, taumafai lo tatou sa. E tele mea e ave i ai le faamuamua a le tatou Malo i lenei vaitau. Aua e leai se aoga i le Palemene ma Samoa o le saga tutuli pea o maua. Ae o le a foi se agasala ulua ua o ma faia?

Sa lagona lou fiafia ia te au lava ia ina ua avea lau afioga ma Taitaifono o le Komiti aua ua e matua i le Maota. Sa e amata foi i le Itu Agai e te malamalama foi i aga faale Itu Agai. E ui i lea lau afioga e pei ona ou taua i le aso o le tatou feiloaiga muamua ma le feiloaiga lua, o le Temokarasi a Samoa e tafatolu. O le a se faaiuga faale-tulafono, ae o le a faafefea le Tulafono a le Atua? E faafefea ia le tatou tu ma le aganuu o lo o tatou sapi

ai ma faafoe ai o tatou aiga ma o tatou nuu ma itumalo i aso fai pea? Ae e ui i lea, ia i lou lava sui usufono, ou te faamagalo, avatu foi le faamalo i lau Afioga ma le Komiti.

O le fesili, o ai Tuilaepa? O ai Lealailepule? O le feau o lenei taeao mai i le Afioga ia Patele, o le lauga faaamuaia a Iesu i le mauga. Ioe, mativa faaleagaga, e tatou te fetausiai ma faapalepaleai, fefaamagaloai. Ia ae fai mai ia ana upu faaiu, a ia outou olioli ma fiafia tele, o lo o i le lagi ia le tou tau'i e tele.

Tuilaepa, malo faafetai i lou lototele, lou onosai ma lou taofi iumaea aua Samoa. E oo lava i lou atalii 5 tausaga e na te iloa oe, aisea? O lau tautua ua iloga, matavela ia Samoa ma le lalolagi atoa. E le mafai ona natia. Pe ou te toe faipule, pe leai, ae ou te faafetai i le Atua ua maua se avanoa e tautua ai i se Taitai faamaoni ma alofa ia Samoa. Le tatou Vaega, lototetele aua le solomuli, aua le faavaivai, ia onosai, taofiofi mamau aua Samoa.

Lau Afioga Lautafi ma Faimalo, faamalo toa, faafetai lotomau i le lua talitonuga. E le o ni faiga vaega, e le o ni faiga upufai. Afai e talitonu le tagata i lona faamaoni, o le mea moni, o le tulaga lea, faafetai.

Lou itumalo, ou te faatoese atu ma ou faamalulu atu lou itumalo. O le a se tou faafofoga mai ma le tou tapuaiga, ia outou silafia mea uma. E tatou te nonofo pea, e faamalulu atu, ua outou malamalama i tulaga o mea uma. Ia faafetai i le tou tapuaiga ia ae le lilo i lalo ia la outou faatuatuaga na aumai ai au i le Palemene e leai se palota. Ia ae tatou te feiloai pea ma tatou tuu i le Atua.

Ou aiga, au uo, si ou toalua ma si au fanau, o outou lava o le matagi, o lo o ou folau ai ma le malosi. O ou tiga o itu ia, ae o le faafiafiaga ma le faamanuiaga tele o le avea o outou ma ou aiga. O le tatou tala, o le mea ou te i ai o le mea lena e tou te i ai. Ia outou lototetele, aua tou te lotovaivai. E pei ona ou fai atu, o le auupega sili e alu ma le fitafita o taua, o le mafuaaga. O le mafuaaga e mafua ai. The most lethal weapon that a soldier takes to war, is the reason why.

Lau afioga i le Fofoga o le Fono, ia e pei ona ou fai atu foi muamua i le taimi na o tatou feiloai ae ou te le i malolo, ua leva ia le ta mafutaga. E malamalama foi i lau afioga. Talofa e, a lailoa. A lailoa, afai ua avea maua ma lenei tagata ma toatuga ma faalavelave, ia faia le finagalo o le Palemene ma lau afioga. A lailoa, e pau le mea ou te alofa i lau Nofoaiga, i le tele o nei mau mea e tulai mai e faalavelave. Ua tataua ona folau i lagima ia le tatou sa, aisea? O faaiuga e tatou te faia, e ola pea. E uma tatou, ae tumau pea ia tatou faaiuga e fai e fesili, pe na a le taimi na avea ai tatou ma Taitai na faafoeina Samoa?

Ae o upu faaiu, tatou aumaia ia le lauga a le Afioga i le Ao o le Malo, aumaia le alofa o le Atua e tatou te laei ai. E tatou te fefaamagaloai, aua tatou te fefulituaai, ae o lana timai ia o tatou loto faatasi aua Samoa. O le a faasee

i le mea pogisa e tatalo mai ai, e tatalo i le lagi mo se tali, ae aua ne i galo, e fesili lava taeao i le aso.

Manuia le Fonotaga i lenei aso lau afioga i le Fofoga o le Fono, faafetai mo lou avanoa.

**FOFOGA FETALAI:** Ua faamalo saunoa i lau Afioga i le sui usufono mamalu mai Faleata Nu.3. Ia o lea lava ua faafofoga manino le paia o le Maota aemaise foi le faafogafogaaga a le atunuu ia e tusa o le saunoaga. Malo faafetai, malo foi le toamalie ma le toafilemu ua aumai e le Atua, ia e maua ai pea ia le tatou nofo filemu. O le agaga faafetai atu, i lau afioga i le sui usufono mamalu o Lepa, lau afioga i le Taitai o le Itu Agai faapea foi lau afioga i le sui usufono mamalu mai Faleata Nu.3, ia o lea lava sa tuu atu le avanoa muamua, ia o lea ua uma ona oulua sausaunoa.

Talu ai o lea ua o tatou taunuu i le tatou taimi malolo, ou te tapa lau afioga i le Tamaitai Palemia mo se lafo.

**Tofa Hon Lauofo Fonotoe Nuafesili Pierre Lauofo (Anoamaa 2):** Lau Afioga i le Fofoga Fetalai, pe maua se avanoa?

### **LAFO MO LE FAAAUAUINA O ITULA FONO**

**Afioga Hon FIAME NAOMI MATAAFA:** Lau Afioga i le Fofoga Fetalai, e tulai atu talu ai o le taua tele o mataupu ua faatulaga mo le aso, aemaise foi o nisi o faamoemoega o le Malo ua atofa mo le aso a taeao, ou te faatu ai le lafo e faapea, *Ina ia faataatiaese tatou Tulafono Tumau 32 mo le suia o tatou itula fono mo le aso lenei e faapea, o le a faataatiaese a tatou Taulumaga i le itula e 1:00 i le aoauli nei, ma tatou toe tauaofia i le itula e 3:00 i le aoauli, seia aulia le itula e 7:00 i le afiafi a nanei.*

Ma le faaaloalo tele.

*Faaluaina e le Afioga i le Sui Palemia ma le Minisita mo Faatoaga ma Faigafaiva.*

*Na faamaonia le lafo.*

**FOFOGA FETALAI:** Ou te faasilasila atu o le a faataatiaese Taulumaga a le Fono Aoao Faitulafono seia aulia le itula e 3:00 i le aoauli nei.

*Na faataatiaese Taulumaga a le Fono Aoao Faitulafono i le itula e 1:03 i le aoauli seia aulia le itula e 3:00 i le afiafi.*